

Txirritola

ARAMAIO / Barikua / 2004ko otsailaren 20a / 97. zenbakia

KOORDINATZAILEA: Ubane Madera • Otalora Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Hauteskunde-mahaietan jardun behar duten herritarrak izendatu dituzte

UBANE MADERA

Zozketatu zituzten martxoko hauteskundeetan mahaietan jardun behar duten 18 herritarren izenak. Pertsona horiek oraingo astean jaso dute jakinarazpena. Orain, zazpi eguneko epea dute erreklamazioak egiteko, Gasteizko hauteskunde-batzordean.

Txanponak eta zenbakidun bolatxoak erabili zituzten asteleheneko batzarrean hauteskunde-mahaietan jardun behar duten herritarren izenak aukeratzeko. Betiko moduan, herrian bi mahai izango dira, eta mahai bakoitzarako bederatzi lagun behar dira: presidentea eta haren bi ordezkari eta bi kide eta bakoitzaren beste bi ordezkari. Beraz, guztira, 18 lagun. Pertsona horiei oraingo astean bertan bidali diete jakinarazpena. Eta orain, zazpi eguneko epea dute erreklamazioak egiteko, Gasteizko hauteskunde-batzordean.

Gero, hauteskunde egunean bertan, martxoaren 14an, aukeratuak 18 herritarrek 08:00etan hauteskunde-mahaietan aurkeztu beharko dute. Eta behin mahaiak eratzen dituztenean,



Txanponen eta bolatxoaren sistema bitartez egin zuten zozketa.

bestelako eragozpenik ez, ordezkariak joan ahal izango dira.

UDALETXEKO LANAK ETA DIRULAGUNTZAK
Horrez gainera, bestelako gaiak ere izan zituzten berbaigai zinegotziak asteleheneko batzarrean. Adibidez, udaletxe lanekin

lotutako tramitazio kontuak landu zituzten. Baita Udala Haurreskolak partzuergoan sartzea ere. Hain zuzen ere, San Martin Eskolan 0-2 urteko haurrentako zerbitzua ezartzea da Haurreskolak partzuergoaren helburua. Mertxe Mondragon alkateak jakinarazi zuenez, dagoeneko egin dute zerbitzu berria eskaini ahal izateko lanen proiektua. Horren arabera, eskolako sotoa erabiliko dute 0-2 urteko umeendako. Jakina, behar bezala egokituta. Hala, proiektua Jaurlaritzako Hezkuntza Sailari erakutsi behar zaio, hark onespena emateko. Eta behin onespena emanda, alkateak esan zuen datorren urtean hasiko dituztela lanak, aurtengo Udalak ez du-eta dirurik.

Udalbatzarrak aho batez onartu zuen proposamena.

Bestalde, eztabaida luzea izan zuten zinegotziak obrekiko lotutako gai batengatik. Hain zuzen ere, obrak-eta egiten direnean enpresek okupatzen duten lur publikoarengatik ordaindu beharreko tasengatik. Tasa horien zenbatekoa aldatzeko aukera proposatu zuen zinegotzi batek baino gehiagok, baina ez zuten gaia sakonago landu.

Eta bukatzeko, bestelako gaien artean zenbait dirulaguntza eskaera aztertu zituzten: Erretiratuen Egunerako eta Emakumeen Asterako Diputazioari eskatzea laguntza, Maider Undari 490 euro ematea eta Jon Agirreren senitartekoei 1.000 euro, preso aramaioarra bisita dezaten.

LABUR

Odola ateratzera etorriko dira datorren astean

Arabako Odol Bankukoek deitu egin dute datorren eguaztentean, hilak 25, odola ematera joateko. Betiko moduan, osasun etxean egingo dituzte odol-ateratzeak, arratsaldean, 16:00etatik 20:00etara.

Jakinarazi digutenez, azkenaldian jaitsi egin da odol ematen duten aramaioarren kopurua. Eta odol beharra berriz, ugartu egin da. Horrenbestez, odola ematera joateko dei berezia egin dute aramaioarrei.

Ibili dira kultura etxeako itoginak konpontzen

Bukatu dituzte kultura etxean zeuden itoginak konpontzeko aurreikusita zituzten lanak. Hain zuzen ere, terrazan eta teilatuan egin dituzten konponketak horiek.

Orain, lehenengo euri-zarrazaren zain daude, ea arazo benetan konpondu duten edo ez ikusteko. Hala, bada, herri-tasunarengatik kaltetuta dauden paretak-eta margotu egingo dituzte laster.

Adinaren muga ezabatuz gero, gazteak lokaletan sartzeko gertu

U.M.

Udalak gazte lokalak erabiltzeko zabaldu berri duen zerrenda dela-eta, gazteekin berbetan izan gara oraingo astean. Kontatu digute gertu egongo liratekeela lokaletan izena emateko, baldin eta Udalak ez balu ezarriko adinarekin lotutako mugarik. Gazte guztiak ados daude horrekin.

Edozein adinetako gazteak sartu ahal izatea lokaletara. Horixe bera eskatzen dute herriko gazteek kultura etxeako gazte-lokaletan sartzeko. Ikusten denez,

murriztu egin dituzte orain arteko eskaerak edo baldintzak. Eta, kontatu digutenez, Udalak ezarritako 20 urteko adin-muga ezabatuz gero, gertu egongo lirateke lokaletan sartzeko.

GUZTIENDAKO EDO INORENDAKO

Gauzak horrela, hori lortu arte gazteek ez dutela lokaletan sartzeko izenik emango jakinarazi digute haien ordezkariak: "Gu sartzen bagara, 20 urtetik gorakoak ere gurekin batera sartuko dira. Eta hori gertatzen bada, Udalekoek berritako ere botako gaituzte lokaletatik. Hortaz, zertarako sartu behar dugu?"

Gaineratu digute gazte guztiak ados daudela erabaki horrekin, nagusiak zein gaztetxoak. Eta oso pozik daudela orain arte jasotako erantzunarekin; izan ere, inork ez du izenik eman Udalaren zerrendan.

Guztira, 70 bat gazte dabilta gazte lokalekin bueltaka, 14 urtetik hasi eta 22 urtera artekoak, hain zuzen ere. Eta gauzak konpontzen ez diren artean, ez dute egoteko leku larregirik aukeran. Izan ere, azken hilabeteotan euren elkartokia izan dena, Santa Ana ermita, hankaz gora dago orain, han egiten dabilta lanen ondorioz.



Denbora luzea daramate gazte lokalen arazoari konponbidea aurkitu ezinda.

TELEFONOJAKINGARRIAK

OSASUNA / LARRIALDIAK

Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal Kirolegia	945 44 53 35
Postetxea	945 44 50 83
Zuiko Eskualdea	945 43 01 67
Suhiltzaileak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00	12:15*	13:00
15:15	15:30	16:15
17:20	17:35	
18:30*	18:45	19:30
19:00	19:15	
21:00	21:25	

GASTEIZ	ARAMAIO	ARRASATE
08:20	09:00	09:15
	10:15	10:30
	11:15	11:30
13:10	13:45	14:10
16:20	17:00	17:20
	17:35	17:50
	19:15	19:30
19:30	20:10	20:25

OHARRA: izartxoak duten orduetan eskaeraren arabera zerbitzua eskaintzen dute. Auzoetako bizilagunei zuzendutako da, eta autobusa erabili gura badute, bezperan deitu beharko dute honako zenbaki honetara: 629 54 59 23

OHARRAK

BAÑERAREN EMAITZAK

Badirudi Bañerako neskek burua altxatzen dabiltzala poliki-poliki. Azkeneko partiduan, behintzat, seina berdindu zuten Francisco de Vitoria taldearen kontra, eta entrenatzailea oso pozik geratu zen neskek egindako lanarekin. Mutilen aldetik ere berri pozgarriak ditugu. Izan ere, joan zen zapatuan 9-5 irabazi zioten sailkapenean lehenengo zegoen taldeari, La Milagrosari. Horrela, eta gol aldeari esker, orain aramaioarrak dira lehenengoak. Oraingo asteburuan, bi taldeek atseden izango dute. Aratusteak direlako.

BARIKUKO ZINEMA

Oso film klasikoa emango dute gaur, barikua, 22:00etan: Victor Fleming-en *Lo que el viento se llevó*. 1939an estreinatutako film horrek bederatu Oscar sari irabazi zituen.

DOMEKAKO ZINEMA

Abenturazko film bat aukeratu dute oraingo domekarako: *Piratas del Caribe*. Aurtengo udan zinema gehienetan ematen ibili diren filmetako bat da.

Gaur eta bihar egingo dituzte Aratusteekin lotutako ospakizunak

U.M.

Gaur ospatu dituzte San Martin Eskolako umeek Aratusteekin; izan ere, datorren martitzenean jai izango dute. Edozelan ere, bihar berriro izango dute aukera, arratsaldean hasi eta iluntzera arte. Tartean urteroko mozorro lehiaketa egongo da.

Euskal Herriko Inauterietan oinarritutako mozorroekin atera dira gaur, barikua, San Martin Eskolako umeak. Euren egin dituzte mozorroak, eskolan. Hala, arratsaldean, jantzi bereziak erakusteko kalejira egin dute, eskolatik plazara. Han, dantza saioa izan dute eta ostean, berriro eskolara bueltatu dira, txokolatea jatera. Gero, martitzenean jai izango dute.

BIHAR, LEHIAKETA ETA PARRANDA

Eta bihar, zapatua, nahi duten herritar guztiek izango dute Aratusteetan ibiltzeko aukera. Arratsaldean hasiko da jai. 17:30ean, kiroldegitik atera eta kalejira izango da plazaraino. Han, mozo-



ARTXIBOA

Aurreko urteetan egon izan den egitarauaren antzerkoa antolatu dute aurtengo Aratusteetarako.

ro lehiaketako sariak banatuko dituzte, 18:00etan.

Sei sari izango dira guztira; taldeen kasuan lau: umeendako bi (90 euro lehenengoari eta 36

euro bigarrenari) eta 14 urtetik gorakoendako beste bi (kopuru berak). Eta, orijinaltasuna ere sarituko dute, taldeka edo bana-ka: 48 euro lehenengoendako eta

30 euro bigarrenarendako.

Horren ostean txokolatea banatuko dute, eta gero, dantzaldia izango da Poco Pico taldearen eskutik.

BOTEPRONTOAN/ Izaskun Ormaetxea · Ormaetxea dendakoa

“Bizimoduak denoi mozten dizkigu hankak; orduan garrantzitsuak dira gurea moduko dendak”

Aramaion badira leku batzuk, urteen poderioz, herrian oso abarneratuta daudenak. Horietako bat da Ormaetxea dendakoa. Hantxe, Bizente Goikoetxea jaio zen etxearen behealdean dago, Morrongo etxean, hain zuzen ere. Izaskun Ormaetxea Etxebarria da dendakoa ugazaba. Mostradore atzean aurkitu dugu, eta makina bat kontu esan dizkigu:

Zela hasi zinen dendarekin?
Aitak zuen dendakoa. Beste batek izan zuen lehenago eta gero aitak hartu zuen. Aita-amak ibili ziren; gero Miren; eta gero neu. Gerra ostean hartu zuen aitak dendakoa, 1944an-edo. Izan ere, gerrarengatik kartzelan egon zen eta handik etorri zenean, Arrasaten zuen lanpostua galdu zuela ikusi zuen. Hala hasi zen.

Gauza asko aldatu dira?
Jendearen eskaerarekin batera egiten dira aldaerak. Adibidez, lehen, telak egoten ziren asko, baina orain, josten ez denez, telarik ez da saltzen... Behararren arabera. Beste gauza batzuk ere aldatu dira: pisua, frigorifikoa, kalkulagailua... Lehen, halakorik ez zegoen. Eta jeneroekin lotutakoak ere bai. Adibidez, lehen, azukrea solte saltzen zen. Erosleak nahi zuen kantitatea poltsa edo paper



“Lehen, eguerdietan, zapatu arratsaldeetan eta domeketan ere zabaltzen zen dendakoa”

batera bota, pisatu, batu eta hala saltzen zen. Olioarendako, berriz, tabernetan zerbeza ateratzeko erabiltzen den aparailuaren antzerako bat erabiltzen zuen aitak. Oraindik ere mostradorean zuloa dago. Gailetak paketeetan sartzen ziren saltzeko. Guk latorrizko (hojalatza) kaxa batean hartzen genituen eta jendeak pisuaren arabera erosten zituen. Domeketan txikitoak saltzen genituen...
Hemen denetik daukazue, ezta?
Den-denetik ez, baina bueno...
Badago ezer hemen ezin dudarik erosi?
Izoztutako produktuak, adibidez ez. Okela eta halakoak ere ez.
Halako dendetan lehen beste erosten da?
Ez, ez. Galtzen doa. Normala da. Gu ezin gara lehiakorrak izan dendakoa handiekin, eta ez dugu laguntzarik. Baina bueno,

“Uholdeak izan ziren 53an; ura sartu zen dendakoa. 1,25 metro hartu zuen urak. Askok galdu zen”

mantentzen gara. Hori bai, igarri dugu. Jendeak erosketa handiak Arrasaten egiten ditu, eta egunerokoa, fruta-eta, hemen. Baina nik gauza bat esan behar dut: pentsatzen dut gu zerbitzu bat ematen gabiltzala. Batzuek pentsatzen dute hori beharrezkoa dela, eta kontuan daukate. Beste batzuek ez. Eta jendea gaztea denean, hartzen du autoa eta ibiltzen da harantz eta honantz, baina bizimoduak denoi hankak mozten dizkigu poliki-poliki. Eta, halako batean, beste pertsona baten laguntza barik ezin duzu autoa hartu eta kanpora joan. Orduan, ondo etortzen da halako dendak txikiak hur izatea. Horregatik uste dut ona dela halako dendak edukitzea. Gainera, tratua ere bestelakoa da. Bezeroak ezagunak dira, eta batzuetan, konfiantza handia dagoenean, konfesatoki bihurtzen da dendakoa. Problema-eta kontatzen dizkigute.
Horrenbeste urtean gertatu zaiuzen gauzarik pozgarriena?
Jendeak ematen dizun poza, esker ona. Behin, batek esan zigun gogorra zela gure lana, ordu mordera sartzen ditugulako. Katean lan egitea hobea zela zioen, baina, era berean, asko eskertzen duela gurea moduko dendakoa bat gertuan izatea.